



Iesus chasse les Marchands & Changeurs du Temple, & pour le signe qu'on luy demande de son pouuoir, il predit sa Resurrection. sous la figure du Temple.

APPROCHANT la Pasques des Iuifs, Iesus monta en Ierusalem, où trouuant au Temple des Vendeurs de bœufs, & brebis, & pigeons, & des Changeurs, les chassa avec vn fouët de cordes, eux, & leurs bœufs, & brebis, & pigeons, & renuersa les tables des Changeurs; Il dist à ceux qui vendoient des pigeons: Ostez ces choses d'icy, & ne faites point de la maison de mon Pere vn lieu de marché, ny vne cauerne de brigands. Alors les Apostres eurent souuenance qu'il est écrit, Le zele de la maison de Dieu m'a consommé. Les Iuifs n'estans contens de ce qu'il faisoit, luy dirent; Et encore, quel signe nous montres-tu du pouuoir que tu as de faire ces choses? Et Iesus répondant leur dist, Destruisez ce Temple, & ie le releueray en trois iours. Les Iuifs luy dirent: Ce Temple a esté edifié en quarante & six ans, & tu le releueras en trois iours? mais ils n'entendoient pas qu'il parloit du Temple de son Corps. Or les Scribes & Pharisiens ayans veu toutes ces choses, cherchoient à le mettre à mort; mais craignirent, à cause que tout le peuple admiroit sa doctrine, & estoit attentif à l'ouïr.